

Arte, Historia y Cultura

ta e formula ideal pa e turismo di clase cu tanto nos ta desea.

Nos por ripara y sinti un aire fresco ta drenta y sali riba nos dushi isla. Un sentimiento profundo pa proteccion di nos cultura y medio ambiente ta resona tur caminda. Aunke semper tin hende cu lo kier kibra nos pida baranca dor di susha esaki y dor di haci actonan criminal contra nos bishitantenan pa asina dañá nos bon number. Asina mes tin hopi hende y gruponan trahando incansabel pa haci di Aruba e paraiso cu turistanan ta busca. Ta exactamente dor di muestra nos cara cultural y artistico lo trece e cambio riba termino medio/largo locual ta trata e bishitantenan y nan motibo specifico pakiko nan ta bin Aruba, pasobra e solo, e biento fresco, nos laman increibel y nos hendenan servicial tey caba. Aña den y aña afo lo mester keda traha riba e aspecto di limpieza general como tambe e idioma Ingles, cu ta primordial den sector di turismo y servicio, hasta por ehempel un restaurant di fast food mester por duna tur servicio den Ingles. Tambe e musica y melodia nos mester cuminsa pensa riba dje seriamente. Mayoria biaha ora bo drenta cualkier tienda e melodia cu ta resona por lo general ta latino y no ta refleha nos propio cultura of sikiera idioma, mientras cu tin varios emisora dedica na nos musica y idioma. E donjo di negoshi mester tuma mas control riba kiko ta drenta den orea di e turista, si e tin interes den futuro di Aruba. Y si di berdad nos kier trece turista di clase riba nos isla, nos mester pensa riba diferente proyectonan cu ta resalta cultura. Nos restaurantnan, comercio y tur hotel aki na Aruba mester cuminsa sintonisa e mes un frecuencia, esta: ARTE, HISTORIA & CULTURA. Sand, Sun & Sea tey di mes.

Adhunto mi ta añadi un bunita articulo cu ta proyecta pa 2007, un sector turistico den futuro caminda cu bishitantenan ta bin cu intencion pa disfruta di mucho mas. Esaki por habri caminda tambe pa un base mas amplio disfruta di turismo y no solamente esnan directamente involvi. Naturalmente e hotelnan ta instrumental den nos plan pa haci di Aruba un isla di Arte & Cultura, pasobra aki nan lo cuminsa sinti cu Aruba ta bibe y cu nos ta orguyoso di tin nos propio identidad.

--
Desiree Croes
Director
Numismatic Museum of Aruba
Museum Antique & Culture Heritage aua
Weststraat z/n, Oranjestad Aruba
Tel: 00297-582-8831
Mobile: 00297-965-6969
Fax: 00297-583-8246
www.museumaruba.com
www.museumaruba.org
Where Money meets History